



Dameins tscharvas uonn en Surselva.

FOTO E. MONN

Dumbrau 2000 tscharvas

(fmr/hh) En Surselva ei vegniu dumbrau dacuort rodund 2000 tscharvas. Quei ei dameins ch'igl onn vargau, lu eri vegniu dumbrau biebein 2350. La dumbraziun dallas tscharvas succeda mintg'onn il temps ch'ils praus el funs dallas vals entscheivan a vegnir verds. Quei carmala neutier la selvaschina. Dumbrau vegn sistematicamein, aschia ein ils resultats lu era cumparegliabels culs onns avon. El district dalla Cadi ei vegniu dumbrau uonn 1061 tscharvas, el district dalla Lumne-

zia/Foppa 953. En omisdus districts ei vegniu registrau dameins tscharvas. In dils motivs pon las bunas catschas da tscharvas dils davos onns esser ch'han aschia gi-dau a stabilisar, respectivamein decimar la populaziun. Mo lu era la preschientscha dil luf. Ina ni l'autra ei daventada si'unfrenda. Ils resultats dallas dumbraziuns surveschan als plans da catscha. Sin fundament dad els vegn decidiu contas ch'ein da sittar.

Dumbrau dameins tscharvas

Las cefras dalla dumbraziun da questa primavera en Surselva ein enconuschentas

DA HANS HUONDER/FMR

Ton el district da catscha dalla Cadi sco quel dalla Lumnezia/Foppa ei vegniu dumbrau questa primavera dameins tscharvas ch'igl onn passau. La populaziun da tscharvas ei tonaton aunc relativamein gronda ed ella media dils davos sis onns. En Sursassiala – la part su dil district dalla Cadi – ei vegni dumbrau dacuort 555 tscharvas. Quei ei nov dapli ch'igl onn vargau e suenter 2008, 2015 e 2017 il quart ault diember insumma. Empau auter sepresenta la situaziun en Sutsassiala. Leu ei vegniu dumbrau uonn 506 tocs. Quei ei 85 pli pauc ch'avon in onn e bunamein 200 dameins ch'avon dus onns cura ch'ins ha nudau il record da 700 tscharvas. Il diember total da 1061 tscharvas el district dalla Cadi stat pli u meins en rama dils davos dus onns. Tenor la dumbraziun ei la populaziun per 76 tocs pli pintga. Il pli ault diember da tscharvas ella Cadi ei vegnius dumbraus avon dus onns cun 1230. Dapi l'entschatta dalla dumbraziun igl onn 1987 ei il diember da tscharvas sedublegiaus el district I. Gliez onn ei vegniu registrau 644 tocs. 2006 han ins dumbrau l'emprema ga 900 tocs e 2008 gia dapli che 1000. Dapi 2015 semova il diember da tscharvas dumbradas ella Cadi constantamein sur 1000 tocs. Quei ein las cefras dalla dumbraziun, la populaziun effectiva da tscharvas ei empau pli aulta essend ch'ei reussescha mai da registrar tuttas.

Stau in migeivel unviern

El district II che cumpeglia la Foppa e la Lumnezia ei vegniu dumbrau uonn 953 tscharvas. Da quei ein 269 vegnididas dumbradas egl areal dalla Lumnezia e 684 en quel dalla Foppa. Igl onn vargau eis ei stau 1218, pia in bien ton dapli. El



En Surselva ei il diember da tscharvas dumbradas questa primavera sereducius en cumparegliaziun cul medem temps digl onn vargau.

FOTO H. HUONDER

district II eis ei l'emprema ga dapi sis onns ch'igl ei vegniu dumbrau dameins che 1000 tocs. Igl effectiv da tscharvas astgass tonaton esser per in bien ton sur 1000, essend ch'ei reussescha ella dumbraziun mai da tschaffar tuttas. El schatzetg va la survigilonza da quei anora ch'ei detti questa primavera rodund 1340. Dapi la davosa dumbraziun avon in onn ein 645 tscharvas vegnididas sittadas ni curdadas per auters motivs, per exempl accidents el traffic sin via e viafier. Ch'igl ei curdau fetg paucas tscharvas quest unviern po vegnir attribui en emprema lingia allas cundiziuns d'aura relativamein migeivlas. Probablamein han las tscharvas era midau per part lur spazis da viver pervia dalla preschientscha permanenta dil luf dalla vart dretga dil Rein el territori entuorn Andiast. Enqualina ei era daventada si'unfrenda. Tenor la survigilonza da catscha semuossa tier la populaziun da tscharvas el district II ina leva tendenza da reducziun. Pil guardiaselvaschina e cau dil district da catscha II, *Arnold Caminada* da Vrin, po era la vegetaziun gia avanzada haver giu uonn in'influenza sillla dumbraziun: «Per part eis ei terrein entochen fetg ad ault, aschia ch'entginas tscharvas eran gia pli ensi tier la dumbraziun.» El sperì denton era ch'ils gronds diembers sittai ils davos onns hagien giu in'influenza sillla populaziun.

Risguard dallas cundiziuns

La dumbraziun da tscharvas ha medemamein stui succeder questa primavera tenor las directivas dil stadi concernent il coronavirus. «Uonn essan nus stai sin viadi mintgamai sulettamein en dus», di Caminada. Normalmein eran tschun persunas per grupper engaschadas. Sper il manischunz era quei era in protocollist, ina persuna culla cazzola e duas per dumbrar.